



Komunikadu Imprensa

Periodu : Marsu 2012

Edisaun : 22 Marsu 2012

Julgamentu ba kazu violénsia doméstika hetan progresu bo`ot iha Tribunál Distrital Dili

Iha loron 21 Marsu 2012 iha oras tuku 03.30, Tribunál Distritál Dili realiza prosesu julgamentu ba kazu violénsia doméstika ho tipu ofensas integridade fízika simples. Kazu ne'e rejistadu ho Númeru Prosesu 421/2011/TDD. Aktu krime refere deskonfia komete husi arguidu ho ínisial RML hasoru lezada HP ne'ebé nu'udar arguidu nia kaben. kazu ne'e akontese iha 27/01/2011 iha Aldeia Golgota, Suco Comoro, Sub Distritu Dom Aleixo, Distritu Dili. Bázeia ba observasaun JSMP nian durante ne'e nota katak, kada loron ba loron Tribunál distrital Díli sempre julga kazu violénsia doméstika.

Prosesu julgamentu ba kazu ne'e prezide husi Juiz singulár Dr. António Helder do Carmo, parte Ministériu Públiku representa husi Dra Angelina Saldanha nomós arguidu rasik hetan asisténsia legál husi Dr. Cançio Xavier, husi eskritoriu Defensória Públiku.

Diretór Ezekutivu JSMP Luis de Oliveira Sampaio haktuir katak, *“JSMP apresia tebes ho esforsu hirak ne'ebé tribunál halo dadaun liu-liu ba prosesu kazu violénsia doméstika ne'ebé hetan progressu bo`ot iha Tribunál Distritál Díli, tanbá durante ne'e tribunál ho esforsu másimu atu aselera prosesu julgamentu ba kazu ho natureza violénsia doméstika ne'ebé akontese iha tinan kotuk nomós agora dadaun.*

Tuir kronolojia ba kazu ne'ebé haktuir iha julgamentu laran katak, iha loron 27/01/2011 arguidu RML prátika aktu violénsia hasoru nia kónjuje ka feen iha aldeia Golgota, Suco Comoro Distritu Díli. Kazu ne'e mosu tanbá arguidu ne'ebé nu'udar lezada nia laen sai husi uma sem kuñesimentu, ba hola fali feto kiik no la hala'o nia responsabilidade hanesan aman ba labarik nain 4.

Aleinde ne'e haktuir mós katak, wainhira arguidu atu mai hare labarik sira, lezada la hatan, tanbá ne'e arguidu basa lezada nia hasan, tuku iha matan to nakles suku pontu tolu iha Óspital no tebe iha lezada nia kelen to sofre bubu no metan hotu. Hahalok arguidu nian rezulta lezada labele halo servisu todan durante fulan ida. Aktu ne'e mós akontese ba daruak iha loron 8/02/2011.

Bázeia ba krime ne'ebé arguidu komete, Ministériu Públiku akuza arguidu ho krime violénsia doméstika ne'ebé regula iha artigu 35 pontu (b) no artigu 145 Kódigu penál Timor Leste ne'ebé mak ho ninia moldura penál prizaun tinan 3 ka multa.

Depois halo tiha produsaun ba faktus, imediatamente halo kedas alegasaun finál. Iha alegasaun finál, Ministériu Públiku husu ba tribunál atu aplika pena prizaun tinan 1 no suspende ba tinan 2.

Entertantu husi parte defeza haktuir katak, bázeia ba faktus ne'ebé produz iha julgamentu hatudu katak arguidu komete krime hasoru nia feen, maibé tanbá ba futuru mós arguidu sei toma responsabilidade alimentasaun ba nia oan nain hat (4) tanbá ne'e husu ba tribunál atu hamenus pena ne'ebé hato'o husi Ministériu Públiku.

Audiénsia julgamentu ba leitura sentensa, sei halo fali iha loron 4/04/2012, oras tuku 15.00 lorokraik.

Atu hetan informasaun kompleitu favor kontaktu direktamente,

Luis de Oliveira Sampaio
Direitor Ezekutivu JSMP
Email, luis@jsmp.minihub.org
Kontaktu: 3323883/7295795